



V 00

M. A. N. 407.

Johann G.

n. 15. weissen Schrift

M. VI. 97.





Kurzer Bericht  
Zum leben vnnnd sterben  
Herrn DOCTORIS GA-  
SPARIS OLEVIANI, Dieners  
des worts Gottes.

Gestellt durch IOHANNEM PISCATO-  
rem, Rectorem der Schule zu Herborn.

HEBR. XIII. ̄. VII.

Gedencket an ewre lehrer/ die euch das wort Gottes gesagt haben/ wels-  
cher ende schawet an/ vnd folget ihrem glauben nach.



Gedruckt zu Herborn in der Graffschafft Nassaw/  
Eageneinbogen/ 2c. durch Christoff Raben.

M. D. LXXVII.



August 1774

Ston ledert vinn

Ston DOCTORS

SPARIS OLEVIAN

1774

Ston ledert vinn

Ston ledert vinn

1774

Ston ledert vinn

Ston ledert vinn



Ston ledert vinn

Ston ledert vinn

M. D. LXXVII





# An den Christlichen Leser.

**A** Christlicher Leser / Dieweil zu besorgen / daß nach dem tödlichen abgang des getrewen Dieners des worts Gottes / Doctoris Gasparis Oleuiani, der Teufel allerley lesterungen von desselben leben vnd sterben / seinen werckzeugen / den widersachern des Euangelions / enngē vnd durch dieselbe in die welt außgiessen werde / vnd sich also vnderstehen wirt / dieses fürtrefflichen lehrers schrifft den einfeltigen auß den hēden zu reißen / In massen dann er an dem auch getrewen vnd fürtrefflichen lehrer der Kirchen / Herrn Iohann Caluino, allbereit gethan / vō welches leben vñ todt vorwenig jarē ein lugēhafte lesterliche histori in offenē truck außgestrewet worden / Ja auch an Doctore Oleuiano, als derselbe noch bey lebē war / Da nemlich einer anno 1569 mit solchen worten in offener predigt herauß gefahren / Die Galuinisten nemen gewöhnlich ein böß end / wie dan an Doctore Oleuiano zu sehen / als welcher sich in gefengnis erhengt habe. Diesen lesterungen nun beyzeiten zu begegnen / vnd fromme Christen darwider zu verwahren / Hat es etliche fürneme leut dieser ort für gut angesehen / daß ich vom leben vnd sterben dieses thewren mañs / vnd weiland vnser getrewen lehrers / ei



nen kurzen bericht in truck gefertigte. Welches ich dann  
frommen Christen zum besten/vnnd zu forderst zur ehre  
Gottes / dessen ewige warheit durch die widersacher sol-  
cher getrewer lehrer gelestert / vnd so vil an ihnen/vnder-  
truckt wirdt/ohnbeschwäret auff mich genommen/vnnd  
mich von seinem leben in stücken die mir nicht allerding  
bewust waren / bey glaubwürdigen Zeugen erkundiget.  
Dann bey seinem Christlichen abscheid vnnd sterben bin  
ich selber/neben anderen fürnemen personen gewesen/ab-  
so daß ich dasselbige nach notturfft fast mit allen worten/  
so damals ganz tröstlich geredt worden / verzeichnet hab.  
Diese meine arbeit/versihe ich mich/ wirt allen gutherzi-  
gen fromen Christen lieb vnd angeneh seyn/ vnd wünsch  
sche von Gott vnserm himlischen vatter/ daß sie durch les-  
sung dieser histori in liebe der göttlichen warheit vnd got-  
seliger lehrer/ durch wirkung des heiligen geistes im na-  
men vnsern Herren Jesu Christi gesterckt wer-  
den/zur ehre Gottes/vnd ihrem ewigen heil/ Amen.

Iohan. Piscator, Rector  
der Schule zu Herborn.

Kurzer



Kürzer Bericht vom  
Leben vnd sterben herren  
DOCTORIS GASPA-  
ris Oleuiani, Dieners des worts  
Gottes.

**D**octor Gaspar Oleuianus, gottseliger  
gedechtnus/ist auff diese welt geboren auff Laurentii  
im jar nach Christi geburt 1536/ zu Trier/ Ist ge-  
taufft in S. Laurentii Pfarckirchen. Sein vatter ist  
gewesen Gerhard Oleuianus ein becker/vnd nach der  
zeit der becker zunfftmeister. Er ist von jugend auff er-  
zogen bey seinem altvatter Antonio Sinzig der mesler zunfftmeister.  
Ist in die schul gangen erstlich zu S. Laurentii, darnach zu S. Simeon,  
darnach in dem Thumbstift/endlich zu S. German bey dem alten Pas-  
ter/von welchem er pflegte zu erzehlen / daß derselbige zur Fasten zeit/  
wann er den Passion auflegte/habe er die propheceiungen des Alten Te-  
staments gegen die histori gehalten / zu lehren wie dieselbigen seyen er-  
füllet worden / vnd sonderlich habe er gemeldet / daß auch die kinder  
Gottes im Alten Testament in den opffern einen vorgeschmack gehabt  
habē des einige versöhnopffers / welches vnser Herz Christus am stam-  
men des creuzes vollbracht/ Welche lehr daß als ein süncklein der rech-  
ten erkantnus des opffers Christi in seinem hertzen gebliben / bis ihm  
Gott hernacher zu seiner zeit dasselbige hat völliger zu erkennen gegeben.

Im dreizehenden jar seines alters/ ist er von seinen eltern gen Pas-  
ris verschickt worden/auff daß er daselbsten die weltlichen Rechte studir-  
te: Welches er auch gethā/zum theil in gemeldter statt Paris/zum theil  
in andern fürtrefflichen Juristenschulen in Franckreich/ als nemlich zu  
Orliens vnd Burgis/ An welchen beyden orten er sich zur heimlichen  
Gemeinde Gottes gehalten.

Seiner er-  
stes sünck-  
lein der er-  
kandnus  
der war-  
heit.



Er hat auch endlich in Doctorem juris promouret zu Burgis/ anno Domini 1557, wie auß folgendem zeugnus Francisci Duareni vnd seiner collegarum zu sehen.

Testimonium de doctoratu Gasparis Oleviani in iure civili.

**D**EI optimi maximi nomine invocato, Franciscus Duarenus, juris civilis Doctor, & Decanus in clarissima Biturigū academia, omnibus harum literarum lectoribus salutem. Cū spectatissimus & consultissimus vir Gasparus Olevianus diocesis Trevirensis strenuam, diligentem diuturnamq; juri civili operam dederit: & suam nobis insignem eruditionem, innocentiam, castitatē, sobrietatē, modestiā, prudētiam aliasq; animi dotes multis gravissimisq; argumentis approbarit: Nos hominis virtutem & eruditionē, ut æquum est, amplexi, cui nullus satis dignus honos á nobis tribui potest, Doctoris insignibus eum ornandum esse decrevimus: eumque juris civilis Doctorē in eadem Vniversitate & juris civilis Facultate creavimus. Ad cujus rei executionem secūdum leges & statuta Vniversitatis nostræ duximus procedendum: nec quicquam eorū prætermisimus, quæ ad solemnem ritum & usitatum necessariumq; in schola morem pertinent. Horum omnium ut major certiorq; sit fides: has literas ab ejusdem Vniversitatis scriba signari, dupliciq; sigillo, nempe sigillo majore Vniversitatis, & altero quod nostræ Facultatis proprium est, ob signari jussimus. Acta gesta q; hæc omnia Biturig. fuerunt, præsentibus DN. Ioanne Rabyrio, Andrea Levescatio, Hugone Donello & Nicolao Bouguyerio juris doctoribus, in eadem Vniversitate actu regentibus: M. Huberto Molinæo, Ioanne Vincentio scholasticis in eadem Vniversitate Biturigum studentibus, & aliis quàm plurimis testibus. Die sexta Junii, anno salutis millesimo quingentesimo quinquagesimo septimo.

Das ist:

Zeugnus vom Doctorat Herrn Gaspars Oleviani in weltliche Recht.

**N**ach anruffung des allergütigsten vñ höchsten Gottes wünschet Fran. Duarenus, des weltlichen Rechts Doctor, vnd Decan in der weitberühmten schul zu Burgis/ allen die disen brieff lesen werden/ glück vnd heil. Nach de der Ehrnhaffte vnd Hochweise Gaspar Olevianus auß dem Bistumb Trier/ embsiglich/ fleissiglich vnd ein ger  
rau



saumie zeit im weltlichen Recht studieret/ vnd vns seine fürtreffliche geschicklichkeit/ vnschuld/ keuschheit/ nüchternheit/ bescheidenheit/ fürsichtigkeit/ vnd andere gaben des gemütes / mit vilen vnd ganz wichtigen anzeigungē mit der that erweisen/ Haben wir seine tugend vnd geschicklichkeit/ wie billich/ mit liebe vmbfangen/ vnd haben derwegen geschlossen/ daß er (dem wir doch keine gnugsam würdige ehr anthun können) mit den freihheiten der Doctoren zu zieren sene / vnd haben in also zu einem Doctor des weltlichen Rechts in gemeldter Vniuersitet vnd des weltlichen Rechten Facultet gemacht. Vnd zu vollziehung dieser sache haben wir nach den gesehen vnd ordnungen vnserer Vniuersitet procediert/ vnd haben nichts von denen stücken vnderlassen/ welche zu der gewöhnlichen ceremoni vnd notwendigem gebrauch der Schulen gehören. Vñ damit dises alles desto mehr vnd gewisser bekräftiget würde/ habē wir befohlen/ daß diser brieff von gemeldter Vniuersitet schreiber geschriben/ vñ mit zweyen sigelen/ nemlich mit dem grösseren sigel der Vniuersitet/ vnd mit dem anderen welches vnserer Facultet eigen ist/ versigelt wurde. Dis alles ist verhandelt worden zu Burgis/ in baysenn herzn Ioannis Rabyrii, Andreae Levescatii, Hugonis Donelli, vñ Nicolai Bouguyerii, Welche allezumal des Rechten Doctores seind/ vñ in gemeldter Vniuersitet jetziger zeit das Schulregiment verwalten/ Desgleichen auch M. Huberti Molinæi vnd Ioannis Vincentii, welche studenten damals in der Vniuersitet zu Burgis studierten/ vnd auch viler anderer zeugen. Am sechsten tag Iunii, im jar des heils tausent fünffhundert fünffzig siben.

Es studierete zur selbē zeit zu Burgis ein junger Herr/ des Hochgebornen Fürstē vnd Herrn/ Pfaltzgr. Friderichen des dritten (welcher hernachmals Churfürst worden) sohn/ Dessen præceptor mit namē Nicolaus Iudex, jme dē herzn Oleviano mit sonderlicher freundschaft zugethan war. Als sie nu sãmplich auff einē tag nach dē mittageffen mit einander für die statt spazierten an das wasser welches nit weit vñ der statt fleußt/ Traffen sie allda etliche studentē an/ welche Teutsche vñ Adel warē/ Die warē in ein schiff getretē/ vñ woltē hinüber schiffen. Als nun dieselbe des hochermeldtē jungen Herrn vñ seines præceptoris ansichtig worden/ vermanetē sie dieselben zu jnē in dz schiff zu treten vnd mit hinüber zu fahren.

Todtsgefahr Oleviani vñ gelübd.



Als aber Sleuianus sahe/ daß dieselbe studēten truncken waren / widers  
riecht er des jungen Herren præceptor, sich sampt dem jungen Herrn  
in dasselbe schiff zu begeben/ Dessen aber ungeacheet/hat gemeldter præ  
ceptor auff vilfaltiges anhalten derselben studenten den jungen Her  
ren mit sich in das Schiff geführet. Da haben dieselbe trunckene studens  
ten/durch mutwillige leichtfertige bewegung das schiff lin vmbgestürzt/  
seind also ins wasser gefallen vnd ertruncken. Da hat der præceptor, wels  
cher wol schwimmen konte vund nüchtern war / den jungen Herrn ges  
fasset/vnd sich vnderstanden mit ihme ans vfer zu schwimmen/welches  
im doch vnmöglich gewesen/vund ist also sampt dem jungen Herrn er  
truncken. Als nu Sleuianus am vfer solche noth sahe/ ist er inen zu hülff  
zu kommen/ ins wasser gesprungen/vnd in den schlamm so tieff hinunder  
gefahren/daß ihm das wasser bis an den hals gangen ist. Da er nu in sol  
cher not war/vnd meynet er müste auch ertruncken/ da hat er zu Gott ges  
ruffen/vnd daneben ein gelübd gethan/ Wann im Gott auß dieser noth  
erretten würde/so woue er seinem vatterland das Euangelium predigen  
wann er darzu beruffen würde. Da hat es Gott geschickt/ daß ein Lakay  
daher gelauffen ist/welcher seinen Junckern daselbst gesucht/ Derselbe  
als er Sleuianū im wasser stehē sahe/vñ vermeinte es were sein Juncker/  
hat er ihm her auß geholffen. Als nu Sleuianus auß solcher noth vund  
todes gefahr von Gott errettet worden/ hat er neben seinem studio juris  
angefangen die heilige Schrift/vnd darneben gute bücher so zu auslez  
gung derselben geschriben/ als fürnemlich herzn Iohannis Calvini, zu  
lesen/vnd hat gleichwol nach der hand in Iure doctorirt, wie obgemelt.

Verlass  
fung des  
studii ju-  
ris.

Als er widerumb gen Trier zu seinen freunden kommen/vnd an  
in begert worden/in einem rechtshandel rath zu geben/ Er aber in solcher  
handlung gemercket / daß das Recht von etlichen wunderbarlich gedräet  
vnd gebogen/ist er dardurch bewegt worden/seinem gelübd nachzusehen/  
nemlich/sich ins Predigampt durch rechtmessigē beruff zu begeben/vnd  
hat also sein ander fürhaben/nemlich die Practicam juris zu erlernen/  
gen Speir zu ziehen/vnderlassen.

Studiert  
Theologi-  
am.

Darnach ist er gen Genff gezogen/allda Theologiam zu studie  
ren/vund ist von dannen gen Zürich gezogen/allda Petrum Martyrem  
vnd



vnd Bullingerum zu hören/ wie er dann auch bey Herrn Petro Martyre ist zu tisch gegangen/ vnd sich im predigen vor Bullingero vnd andern Kirchendienern geübet.

In der widerkehr von Zürich gen Genff/ ist er zu Lausanna in ein Schiff Getretten/ in welchem auch Farellus war/ vnd als er mit demselben in ein gesprech kommen/ vnd er/ Farellus, in gefragt/ ob er noch nicht in seinem vatterland geprediget habe/ welches er bekant noch nit geschehen seyn/ hat ihn Farellus zum höchsten vermant/ er wolle solches auffschest thun/ welches er im auch mit gegebner hand verheissen hat.

Als er nu zu Genff die heilige Schrifft studieret/ hat die Christliche Gemeinde Gottes zu Mez an das presbyterium zu Genff begeret einen Diener des worts/ Auff welches begerē er Olevianus vnd Petrus Colonus zur wahl fürgeschlagen worden seind/ Er aber hat sich entschuldiget/ zum theil daß er im fürgenommen hette/ durch Gottes gnad in seinem vatterland das Euangelium zu predigen/ wie er auch demselben für anderen zu dienen sich schuldig erkennet/ zum theil auch daß er dem Herrn Farello solches zu thun verheissen hette. Darauff dann Herz Caluinus ihne in seinem Christlichen vorhaben bestetigt.

Hernacher anno 1559 als er von Genff widerumb gen Trier  
Fornen/ ist er sampt seinem bruder Friderico Doctore Medicinæ, welcher mit ihm ankommen war/ von der freundschaft vnd auch von dem  
ganzen Rath freundlich empfangen worden. Vnd haben Burgermeister  
vnd Rath als bald an ihn begeret/ daß er der statt Trier/ als seinem vatterland / mit lehren dienen wolte / vnd ime darauff hundert Rädergulden jargeldt verordnet/ daß er in der Bursch (welche Schul nun viel jar her nicht in ihrem gang gewesen war) Dialecticam Philippi vnd anders  
desgleichen lesen solte. Als er nu in erklerung der Dialectica Philippi,  
da vil exempla Theologica eyngeführt werden/ anlaß genommen die  
Christliche lehr in gemeldten exempeln zu erkleren/ haben ihm die Capitelsherren das lesen verbotten/ vnd endlich auch die Schul verschlossen.

Darauff haben im Burgermeister vnd Rath befohlen in S. Jacobs spital/ welches der statt zugehörig/ zu predigen/ Da er dann auff S. Laurentii tag seine erste predigt gethan. Als er nu etlich mal gepre-

B

Beruff  
Herrn  
Olevianus  
ni zu Trier  
er.



diget hatte / haben seine widersacher einen Messpriester zugerichtet / welcher auff eine zeit unverschens vor ime / Oleuiano / in einem chorwock (den er zuvor mit einem mantel bedeckt hatte) auff die canzel gestigen zu predigen. Als aber das gemeine volck denselben gesehen / habē sie mit lauter stimme geruffen / er solte wider herab gehen / dann sie wolten ihn nicht hören. Doctor Oleuianus aber hat sie vermanet / sie solten ihn hören / wo er vnrecht lehrē würde / wolte er sie hernach berichten. Als er aber solches von dem volck nicht hat können erlangen / vnd dem priester sehr angst gewesen / wie er ohne gefahr darvon kommen möchte / hat Doctor Oleuianus ihn getöstet / mit vermeldung / es solte ihm kein leid geschehen / vnd hat also dem volck abgewehret / vnd den priester bey der hand zur Kirchē hinauß geführet / vnd ist darauff auff die canzel gegangen / allda seine vordigende predigt zu thun. Von wegen aber des erregten tumults hat er zuvor die Gemeinde gefraget / ob sie auß forcht der gefahr ihne des predigens erlassen wollen / oder aber ob sie noch wie zuvor / ihn zu hören begeren / vnd ine also in diesem seinem beruff bestetigen. Darauff sie dan mit auffgereckten henden vnd lauter stimme geantwortet / ja / ja / wir bitten euch vmb Gottes willen / daß jr fortfahren wollet.

Auff diese handlung seind die beyde Burgermeister vnd etliche andere Rathsgenossen vnd burger / durch des Churfürsten befehl / auff das Rathhaus in hafftung enngemanet worden / vnd haben Doctorem Oleuianum erbetten / daß er mit ihnen in solche hafftung gegangen ist / sie allda zu lehren vnd zu trösten. Vnd seind also sie sämtlich auff dem Rathhaus gefangen gesessen zehen wochen vnd etliche tag.

Witler weil seind sie einmal für recht gestellt worden / vnd als sie nach geschehener anlag (welche viel articul in sich hielt) vierzehen tag auffschub begeret / sich zu verantworten / Vnd aber ihnen nur zween tag erlaubet worden / haben sie durch heimliche post den Churfürsten Friderich / Pfalzgraffen bey Rhein / vnd vnd Herzog Wolffgang zu Zwenbrückē / vnd die Herrn der statt Straßburg vmb hülff angeruffen / welche dann alsbald ihre post vnd gesandten abgefertigt / durch dieselbe

be



Be den angefangenen Gerichtsprocess; verhindert/ vnd endlich erhalten/  
das die gemeldte gefangenen seind entlediget worden.

Vnd hat zur selben zeit der Churfürstliche gesandte/ Herr Baz <sup>Beruff</sup>  
lentin/ Graf zu Erpach/ Burggraf zu Alze/ Doctorem Oleuianum, <sup>Herren</sup>  
als derselbe noch im gefengnus war/ im namen vnd von wegen des hoch- <sup>Oleuias</sup>  
ermeldten Churfürsten Fridrichen Pfalzgraffen/ <sup>ni gen Hei</sup>  
zu dienst beruff- <sup>delberg.</sup>  
fen/ vnd in auch alsbald mit sich nach Heidelberg geführet/ welches ge-  
schehen anno 1560.

Da hat ihn der Churfürst zum præceptor in der Sapienz bestelt/  
welches ampt er dann onsehrlich anderthalb jar verrichtet.

Zur selben zeit hat er sich in den ehestand begeben mit einer gotts-  
fürchtigen witwe Philippina von Mez/ vnd hat bald darnach in Do-  
ctorem der heiligen Schrift promovieret, vnd ist zum Professore  
Theologiæ in der Vniuersitet beruffen worden.

Vnlangst darnach ist er durch vilfeltig anhalten Churfürstlicher  
Räthe zum predigampt beruffen worden/ erstlich zu S. Peter/ darnach  
zum heiligen Geist.

Welches dann gewähret bis zum tödtlichen abgang des hoche-  
meldten Churfürsten hochlöblichster vñ gottseligster gedechtnus/ Frides-  
rich des dritten/ Pfalzgraffen bey Rhein/ <sup>re.</sup> welcher gottselig im Herrn  
verschieden anno 1576. den 26 Octobris.

Wenig tag darnach ist er von dem Wolgebornen Herrn/ Herrn <sup>Beruff</sup>  
Ludwig von Sein/ Grafen zu Witgenstein/ <sup>gen Ber</sup>  
zu gen Berleburg beruff- <sup>leburg.</sup>  
fen worden/ Allda er ihrer Gnaden söhne in Christlicher lehr vnd guten  
künsten vnd sprachen vnderrichtet/ vnd darneben auch geprediget.

Anno 1584 ist er von dem auch Wolgebornen Herrn/ Herrn <sup>Beruff</sup>  
Johann dem Eltern/ Grafen zu Nassaw Casenelnbogen/ <sup>gen Her</sup>  
zu Pfarzer <sup>boru.</sup>  
gen Herborn beruffen/ Welches ampt er bey die drey jar lang versehen/  
vnd darneben in der Schule gelehret hat: Welche Schule zwar woler-  
meldter Graf Johann auff sein/ des Oleuiani/ rath vnd angeben/ auff  
gerichtet vnd gestiftet hat.

Anno 1587 den 25 Februarii ist er auß schwachheit ligen blis-  
ben/ vnd von tag zu tag matter worden/ bis ihn der HERR auß diesem



Jammerthal zu sich beruffen. Vnd wiewol er etwas arzeney gebraucht/  
so hat doch die franckheit von tag zu tag vberhand genommen/vnd hat  
der arzt dafür gehalten/es seye ein wassersucht gewesen.

Als er nu gemercket/das er je lenger je matter würde/hat er den  
elfften Martii sein testament auffgericht / vnd dieselbe ganze zeit vber  
sich zu einem Christlichen abschied gerüstet/wie dann auß gemeltem tes-  
tament zu sehen/welches also lautet:

Herren  
Oleuias  
in testa-  
ment.

**I**n namen Gottes des Vatters/des Sohns/vnd  
des heiligen Geists / hab ich Gaspar Oleuianus  
Diener des worts Gottes / weil Gott der HERR mich  
bey gutem verstand gelassen/disen meinen letzten willen  
kürzlich also eröffnen wollen. Vnd erslich dancke ich mei-  
nem liebē Gott/dem Vatter/ Sohn vnd heiligem Geist/  
das er mich zu einer vernünfftigen creatur auff dise welt  
geschaffen. Demnach insonderheit das er mich krefftig-  
lich beruffen/vnd den glauben geschenckt/vnd vnsern ei-  
nigen mitler vnd heiland Jesum Christū/mich mit dem  
lebendig gemacht / da ich erstorben war in sünden/vnd  
mir in jm geschencket die gerechtigkeit Gottes in dem hei-  
ligen opffer meines heilands Jesu Christi/vnd zukünfftig-  
ge herzlichheit/vnd mir offenbaret den reichthumb seiner  
genadē/das er mich erwehlet hat zur kindschafft in Chri-  
sto auß genadē / daher alle dise wolthatē fließen/vñ mich  
der theilhaftig gemacht durch den geist der kindschafft/  
der da rufft Abba lieber vatter/Vñ bitte in/das er seiner  
gnedigen verheissung nach / seine allmechtige vnd gnedi-  
ge hand vber mir halten wolle bisz ans ende/ wie er mir

vera-



verheissen hat / Meine schäflein wirt mir niemand auß  
meiner handt reissen / Der mir sie gegeben hat / ist stercker  
dan sie alle / Ich vnd der vatter seind eins. Itē im Psalm /  
Küret mir meine gesalbtē nit an. Ich danck jm auch auß  
grund meines hertzen / für alle andere wolthaten / die er  
mir vnzählich von muterleib bis auff dise stund geistlich  
vnd leiblich bewisen hat / ohn alle mein verdienst / als sei-  
nem kind / Mir auch weib vnd kind bescheret hat / die ich  
jm auch hiemit ( wie auch meine liebe muter ) in seinen  
schutz vnd regirung seines guten geistes von hertzen will  
befohlen haben / vnd beruhe endlich in der kindschafft /  
die er auß genaden mir vnd den meinen hat versprochen.

Vnd wolte nun ferners Gottes genad vnd segen  
wünschen insonderheit der Pfalz / den Gräfflichen häu-  
sern / Witgenstein / Solms Braunsfels / vnd Nassaw  
Saxenelnbogen / mit vnderthenigster bitt / daß sie das  
angefangene werck der Schulen vnd Druckerey nicht  
wollen ersitzen lassen / als eine grosse genad vō Gott / die  
zu viler menschen trost dienet / vnd sonderlich zu Gottes  
ehren / das liecht der warheit zu erhaltē vnd fortzupflan-  
zen. Vnd bitt / daß sie sich bey einer guten sach / die Got-  
tes sach ist / nicht scheuen. Ferners / daß sie auch die syno-  
dos handhaben / vnd mit dem zimlichen nutz derselben zu  
frieden seyen / wie auch die Visitationes zu gewissen zei-  
ten. Daß man auch mit verkauffung der Kirchengüter  
mit grosser fürsichtigkeit handele. Dann sonst die arme



Pfarrer allgemach sich nicht werden erhalten können.  
Man soll auch billich von den Pfarren die vil haben/ et-  
was den andern mittheilen die wenig haben/ vnd dassel-  
be wol vergewisseren.

Was dan des Volgeborenen Herrn / Herrn Johann  
Grafen zu Nassau Katzenelnbogē Gräfliche Kinder an-  
langt/ so mich in meiner frantzheit besucht/ bitt ich Gott  
das die erinnerung so ich inē durch Gottes gnad gethan/  
vnd dargegē auch ire versprechung/ so sie vermittelst der-  
selben gnaden mir auch gethan/ Gottes ehr vnd ire eige-  
ne wolart betreffend / immer krefftig seye durch Gottes  
geist vnd regierung/ so wirt Gottes seggen bey ihnen seyn.

Meine liebe hausfraw Philippinam belangend/  
danck ich vnderthenigst dē Volgeborenen/ ic. meinē gnedi-  
gen Herrn/ das ire Gnaden sie so gnediglich bedacht/ wie  
auch unsere kinder. Insonderheit aber danck ich ir Gna-  
den/ das sie die wolthaten/ so sie meinem sohn Paulo hat  
widerfahren lassen/ freiwillig es gethan hat ohne verstri-  
ckung der obligation, wie ihr Gnaden sich selbst gegen  
mir anfangs außtrücklich gnediglich erkleret: Dieweil  
mā durch solche obligationes auß liberalibus inge-  
niis mehr mancipia zu machen pflegt/ dan auffrichtige  
leut zu ziehen. Wie ich auch gleichsals solchs künfftig von  
meinē sohn Ludwigē verstehe/ Welche beyde meine söhne  
ich hiemit zur kindlichen danckbarkeit vnd allen trewen  
wil



wil ermanet haben / wie auch meine liebe haußfraw kein  
nen fleiß sparen wirt durch Gottes gnad.

Was nu meine liebe muter anlangt / ist mein will / wie  
auch Doctor Riuius eyngewilligt hat / daß die entlege-  
ne güter in der Oleuia mit nutz verkaufft werden / vnd  
die muter ire leibzucht darvon hab / Allein wie sie selbst be-  
williget / meiner haußfrawen so vil von den verkaufften  
ligenden gütern barschafft in die hend gegeben werde /  
als Doctor Riuius schon in den hendē hat / damit mein  
haußfraw desto besser die kinder zur Schul halten könn-  
ne. Bitte auch vnderthenigst meinen gnedigen Herrn / ir  
Gnadē wolte allezeit ire handt ober meiner lieben muter  
halten / wie auch ober meinen liebe bruder Matthes Sle-  
manus / an welches trew ich nit zweiffel. Von welche diß  
mein letster will ist / Daß / wann es zum abtheilen kom-  
men sol / er hundert Franckfurter gülden voraus nemen  
sol / zum zeugnis meiner brüderliche liebe. Will Doctor  
Riuius sein drittheil nit eynwilligen (das ich nicht hoffe /  
als zu meinem lieben schwager) soll man Doctoris Ri-  
uii theil als ein drittheil / von dem meinen theil nemen  
zu dem anderen / damit die hundert gülden voll wer-  
den / wie ich ihn dann schwägerlich hiemit will gebetten  
haben / zum zeugnis vnser Christlichen liebe.

Da es sich nun zutrüge / daß meine kinder von  
Gott auß diesem jammerthal beruffen würden vor mei-  
ner lieben muter / Soll die niessung der blumen vnser  
erbguts in der Oleuia, wie obgemeldt (das ist / daß mei-



ner haußfrawen so viel heraus gegeben werde / so vil als  
Doctor Riuius hat ) meiner lieben muter bleiben/  
Den engenthumb aber soll mein liebe haußfraw erben.

Den haußarmen leuten vnd vertribenen Christen  
aber darvon hundert Franckfurter gülden einmal für  
alles / desgleichen dem geringeren tisch der Commu-  
nitet in der Schule zu Herborn auch hundert Franck-  
furter gülden einmal für alles / welche demselben tisch  
sollen angelegt werden.

Ich hab noch allerhand geschriben ding / welches  
alles mein haußfraw fleissig auffheben soll / will auch nit  
daß etwas leichtfertig gedruckt werde. Insonderheit ist  
noch vorhanden was ich vber die erste epistel an die Co-  
rinther in der Pfaltz gepredigt habe.

Will also hiemit meinem lieben Gott / Vatter/  
Sohn vnd heiligem Geist / durch den einigen vnd ewi-  
gen Hohenpriester / mein leib vnd seel befohlen haben/  
auff seinen gnadenbund vnd zusag / daß er mein Gott  
vnd meines samens in ewigkeit seyn will / vnd nimmer-  
mehr auß keinem zorn wider mich handeln / wie er dann  
mir des ein aid geschworen Esaie am vier vnd fünffzig-  
ste / Es soll mir seyn wie das wasser Noah / da ich schwur /  
daß die wasser Noah solten nicht mehr vber den erdbo-  
den gehen / Also hab ich geschworen / daß ich nicht vber  
dich zörnen / noch dich schelten will. Denn es sollen wol  
berge



Berge weichen vnd hügel hinfallen / Aber meine gnade  
soll nicht von dir weichen / vnd der bund meines frides soll  
nicht hinfallen / spricht der H & X X dein erbarmen.  
Amen.

Ego Caspar Oleuianus manu propria subscripsi: & co-  
ram sancta Trinitate profiteor, me synceram fi-  
dem Christianam per Dei spiritum & gratiam do-  
cuisse voce & scriptis, & in ea fide atque doctrina  
per Dei gratiam in salutem æternam per obsigna-  
tionem Spiritus sancti perstare, fretum ipsius gra-  
tia: qui eam mihi é verbo suo revelavit. Amen, per  
Iesum Christum.

Das ist:

Ich Caspar Oleuianus hab mit eigener hand vnder-  
schriben / vnd bezeuge öffentlich für der heiligen Drei-  
faltigkeit / daß ich den vnerfälschten Christlichen  
glauben durch den geist vnd gnade Gottes / beide mit  
stimme vnd schriften gelehret habe / Vnd daß ich in  
demselben glauben vnd lehr durch die gnade Gottes  
zur ewigen seligkeit / durch die versiglung des heiligen  
Geists / bestehe / mich auff seine gnad verlassende /  
welcher mir sie auß seinem wort hat offenbaret. A-  
men / durch Iesum Christum.

Nach auffrichtung dieses testaments hat er den andern tag dar-  
nach / nemlich den zwelfften Martii einen brieff dictiert an seinen sohn  
Paulum / welcher damals zu Kirchloch im Bisthumb Speierfranc  
gelegen / in welchem er ihm zu wissen thut / daß er sich nu mehr zu einem  
Christlichen abscheid schicke / vnd desselben alle stund erwarte / vnd ihn  
derwegen tröstet mit der vätterlichen gnaden Gottes / vnd auch verma-  
net daß er sein studieren dahin richten wolle / damit er vilen leuten nutz  
seyn möge. Derselbe brieff lautet also:

Ⓒ



Brief  
Doctoris  
Oleviani  
an seinen  
sohn Pau-  
lum.

Charissime fili Paule. Dico cum patriarcha Iacob, Expecto salu-  
tare tuum Domine. Eo enim loco sunt res meæ, ut dicam  
cum Apostolo, Cupio dissolvi & esse cum Christo: Cui etiam te to-  
tum ut in sacro baptisinate, ita etiam nunc in migratione mea ad  
Dominum, uná cum suavissima matre, fratre & sorore commendo  
& trado, & verbo gratiæ ipsius. Fuiisset quidem mihi gratus tui con-  
spectus: sed nolui te conjicere in periculum, hoc frigore, & crure  
nondum satis consolidato. Disposui autem de rebus omnibus ut pi-  
um parentem decet: & generosus noster Dominus Comes Ioannes  
munificentiam erga vos cum libertate vestra conjunctam diplo-  
mate suo confirmavit. Ego in singulas horas migrationem ad Do-  
minum expecto. Ne præcipitanter te des in viam: videbimus nos  
mutuó in vita æterna, secundum foedus Dei gratuitum. Commen-  
do tibi piissimam matrem, quam scio te diligere: fratrem Ludovi-  
cum tenerum suscipe ut mea viscera, & pro prudentia tibi á Deo  
concessa suaviter rege. Ne appetito res altas, sed esto contentus me-  
diocribus: & studiorum labores eó dirige, ut profint multis. Benedi-  
ctio Domini sit in egressu & ingressu tuo, amen: & in *q̄o deo* gratui-  
ta acquiescat spiritus tuus, expectans mecum hæreditatem coele-  
stem, per & propter Dei filium, Amen. Data Herbornæ, die 12 Mar-  
tii intra quartam & quintam, dictatæ ex lecto. Anno 1587.

*Tuus pater Caspar Olevianus Trevir, verbi Dei mini-  
ster, manu propria subscripsi.  
Domine Iesu suscipe spiritum meum. Act. 7.*

Das ist:

Erklicher sohn Paule/ Ich sage mit dem Altvatter Jacob/  
Herr/ ich warte auff dein heil. Dann meine sachen stehen als  
so/ daß ich mit dem Apostel sage/ Ich begere auffgelöset zu wer-  
den/ vñnd bey Christo zu seyn: Welchem ich auch dich ganz vñd gar/  
gleich wie im heiligen Lauff/ also auch jezund in meiner hinfart zum  
Herten/



**H** **E** **R** **E** **R** / sampt deiner ganz freundlichen muter / bruder vnd  
schwester / befehle vnd vbergibe / vnd dem wort seiner gnaden. Es were  
mir zwar lieb gewesen / das ich dich hette mögen sehen / aber ich hab dich  
nicht wollen in gefahr setzen bey dieser kelte / vnd da dein schienbein noch  
nicht genugsam wider zusamen gewachsen vnd gestercket ist. Ich hab ab  
ber anordnung gethan von allen dingen / wie einem gottsförchtigen vater  
gebüret / Vnd vnser gnediger Herz Graf Johann hat seine milte freiz  
gebigkeit gegen euch / welche mit ewer freiheit verfüget ist / mit seiner  
Gnaden brieff vnd sigel bekrefftiget. Ich warte alle stund das ich zum  
**H** **E** **R** **E** **R** hinfahre. Begib dich mit eilends vnd vor der zeit auff den  
weg / Wir werden einander sehen im ewigen leben / vermög des gna  
denbunds Gottes. Ich befehle dir deine gottselige muter / welche ich  
weiß das du sie lieb hast: Deinen zarten bruder Ludwig nim auff als  
mein eigen herz / Vnd regiere ihn freundlich nach der weißheit welche  
dir Gott verlichen hat. Strebe nicht nach hohen dingen / sonder laß dich  
genügen an mittelmessigen dingen / Vnd richte die arbeit deines studies  
rens dahin / das es vielen leuten nutz bringe. Der seggen des **H** **E** **R** **E** **R**  
**E** **R** seye in deinem außgang vnd eyn gang / Amen. Vnd dein geist bes  
ruhe in der gnadenreichen kindschafft Gottes / vnd erwarte sampt mir  
das himlische erb / durch den sohn Gottes vnd vmb seiner willen / Amen.  
Gegeben zu Herborn den zwelfften tag Martii zwischen vier vnd fünff  
vhren / Dictieret auß dem bett. Anno 1587.

Ich dein vatter Caspar Slenianus von Trier /  
Diener des worts Gottes / hab mit eigener  
hand vndersriben.

**H** **E** **R** **E** **R** Jesu nim meinen geist auff. Act. 7.

Es haben in in seiner franckheit besucht die beyde Wolgeborne  
Herrn / Herz Ludwig von Sain / Graf zu Witgenstein / vnd Herz Jo  
han der elter / Graf zu Nassaw Casenelnbogen: Zu welchem er gesagt /  
er habe in dieser seiner schwachheit recht lernen erkennen / was sünd sey /  
vnd wie hoch die maiestet Gottes seye / vnd das es gar nicht gelte / das  
wir menschen Gott zu einem gesellen haben wollen. Welches er dann  
wider die erdichte kreffte vnd freyen willen des menschen geredt hat.

Vertwerf  
fung des  
freien wil  
lens,



Verma-  
nung an  
die junge  
Herrn zu  
Nassau.

Vorges-  
schmack  
des ewi-  
gē lebens/  
so dē herin  
Dleuiano  
widerfah-  
ren.

Psal. 42.  
v. 2.

Es haben in auch am achten Martii besucht die beyde auch wolge-  
borne junge Herren/des wolermeldten Graff Johannē söhne/ nemlich  
Graff Johaū der jünger/ vnd Graff Georg/ Dieselbe hat er vermanet  
erstlich zu brüderlicher liebe vnd einigkeit/ Darnach vnd zum andern zu  
erhaltung des angefangenen wercks der schule zu Herborn/ Ferners vnd  
fürs dritte zu erbernde gegen die arme vnderthanen/ Letzlich vnd zum  
vierten/ zū gehorsam gegen irem herin Vatter. Auff welche vermanung  
dan sie in die gemeldte stück versprochen. Vnd nach dem dieselbe vō im  
gegangen/ ist im etwas wunderbarlichs begegnet/ welches er mir vnd ei-  
nem studioso, Abelo Conders von Helpen/ des folgenden tags erzehlet  
hat ongefährlich mit disen Worten. Gestern (sprach er) als die beyde jun-  
ge Herrn von mir gegangen/ hab ich vber die vier stundē lang eine vnauß-  
sprechliche freude gefühlet/ Also daß michs wunder nam/ daß mein weib  
vnd muter nach der hand mich frageten/ ob es besser mit mir wordē were.  
Dann mich dauchte / es hette mir nicht besser seyn können / vnd ich wils  
euch erzehlen/ ein wunderbar ding. Ich war auff einer sehr schönē wisen/  
vnd als ich da spazierte/ wurde ich begossen mit des himmels tau/ vnd daß  
selbe nit tröpffels weis/ sonder als mit schüsseln voll / vnd daher hab ich  
an leib vnd seel vnaußsprechliche freude empfunden. Als ich darauff zu  
im sagte/ Der gute hirt/ vnser Herr Christus/ hat euch als sein schäfflein  
auff seine waid geführet / antwortet er/ Ja er hat mich geführet zu den  
brunnen des lebendigen wassers. Vnd als ich an einē andern tag in die  
sach/ trosts halben erinnerte/ vnd sagte/ Gott hette in ein vorbild des ewi-  
gen lebens sehen lassen/ sprach er: Es ist nit nur ein bild gewesen/ sonder ei-  
ne empfindung. Vnd disen wunderbarē handel hat er nit allein mir/ son-  
der auch andern erzehlet. Er pflegte auch zu sage/ Quemadmodū desi-  
derat cervus ad fontes aquarum, sic desiderat anima mea ad te Deus.  
Das ist: Wie der hirsch ein verlangen hat nach den wasserbrunnen/ also  
hat meine seel ein verlangen nach dir O Gott. Item, Ego velim meum  
iter ad Dominum non diu differri. Das ist: Ich wolte daß meine reise  
zū Herren nit lang auffgezogē würde. Item, Cupio dissolvi & esse cum  
Christo meo. Das ist: Ich begere auffgeloset zu werden vnd bey meis-  
nem Herrn Christo zu seyn.

Am



Am fünffzehenden Martii da er zwischen neun vnd zehen vhr vnter  
 schiden/ als ich des morgens vmb sechs vhren zu ihm kam/ vnd in klage/  
 Das er so matt vñ schwach were/ sprach er zu mir: Ego tendo ad Christū.  
 Das ist: Ich bin auff dem weg zu Christo. Da sprach ich/ Tu es in bono  
 itinere: Dominus sua gratia te confirmet. Das ist: Ihr seit auff gu-  
 tem wege/ Der H E X X stercke euch mit seiner genad. Er antwortet/  
 Hoc mihi promisit. Das hat er mir verheissen. Da sagt ich/ Er wirts  
 auch thun. Darauff sagt er/ Amen. Vnd bald darnach/ Cupio dissolvi  
 & esse cū Christo meo. Das ist: Ich begere auffgelöset zu werden/ vnd  
 bey meinem Herrn Christo zu seyn. Item/ Kompt her zu mir alle  
 die jr mühselig vñ beladē seyt/ Ich wil euch erquickē. Item/  
 Es stehet im psalmen/ Nolite tangere Christos meos. Das ist: Tasset  
 meine gesalbten nicht an. Dieses (sprach er) ist fürnemlich von den leh-  
 rern zu verstehen. Vnd zwar diese außlegung bringt der text selbs mit/  
 Sintemal als bald im selben versickel folget/ Vnd thut meinen pros-  
 pheten kein leyd.

Er hat auch zur selben zeit von mir begeret/ ich solte ihm fürlesen  
 den spruch auß dem 9. capitel Esaie/ welcher begriffen ist in dem 2. 3. 4.  
 5. 6. 7. versickel. Da vnder andern dise wort von Christo stehen: Vns  
 ist ein kind geboren/ ein sohn ist vns gegeben/ welches herz-  
 schafft ist auff seiner schulter/ Vnd er heist Wunderbar/  
 Rath/ Krafft/ Held/ Vatter der ewigkeit/ Fridfürst/ &c.  
 Darnach den spruch auß dem anfang des elfften capitels/ da von Chris-  
 to gesagt wirt/ wie der geist des H E X X X auff ihm ruhe. Darnach  
 den hundert vnd dritten psalm/ Lobe den Herrn meine seele/ vnd  
 was in mir ist/ seinen heiligen namen/ &c. Letztlich den spruch  
 im sechsten an die Hebreer/ vom dreizehenden versickel an bis ans ende  
 des capitels/ Da dann stehet/ wie vns Gott das ewige leben mit einem  
 end verheissen hab durch den ewigen Hohenpriester Christum. Auß wel-  
 chen sprüchen allen/ nach verlesung eines jedern/ ich in getröstet/ vnd hat  
 er solchen trost mit herzen angenommen/ wie er dan genugsam mit wort-  
 ten vnd geberden bezeuget. Letztlich hat ihm Iacobus Alstedius, der eine  
 helffer/ fürgelesen das drey vnd fünffzigste capitel Esaie/ vom leiden



vnd sterben vnd aufferstehung Christi/ vnd in gleichfals darauff getro-  
stet. Ungeferlich dritthalb stund zuvor ehe er verschiden / fragte er  
mich / ob es nicht rathsam were / daß er dem hern Bernhardo Textori,  
(welcher der ander helffer ist) befehle / die predigt etwas baldt anzufan-  
gen / vnd auch etwas fürker zu machen / damit die Gemeinde auff alle  
beldest das gebett für in thun möchte / welches ich dan auff sein begerē be-  
stellet. In währder predigt hat er mich erinnert seines letzten willens von  
seinen hinterlassenen schriften / vnd gesaget / Er habe hern Bernhar-  
do Textori, seinem helffer / befehch geben / wie wirs damit sollen halten.  
Vnd ist diß der befehch / daß wir in den truck fertigen sollen seine Pres-  
dige vber die erste epistel an die Corinthen / vnd die notas oder kurze ver-  
zeichnussen seiner predigt vber die Sontags Euangelia / item / vber die  
epistel an die Epheser. Ferner sollen wir / wann man sein buch De foe-  
dere wider trucken wirt / hin vnd wider hinenn setzen / was er in seinen lets-  
te dictatis darzu gethan hat. Bald darnach hat er vns die wir bey im wa-  
ren zum gebett vermanet / vnd nach dem wir nider geknyet / mit auffge-  
reckten zusamen gefaltenen henden das gebett selber gesprochen zu Gott  
dem himlischen vatter / daß er ihm bald auß gegenwertiger noth erlösen  
wolte.

Vber ein weil darnach hat er an vns begeret / wir wolten mit hal-  
ber stimm singen / Nu bitten wir den heiligen Geist. Welches wir dann  
gethan / vnd hat er mit seiner damals schwachen stimm mitgestimmet.

Summa  
der Christ-  
lichen Lehr  
von vnser  
seligkeit.

Er hat auch kurz zuvor sich zu seiner muter gewandt / vnd jr erzeh-  
let die summa der Christlichen Lehr von vnserer seligkeit / ongefährlich  
mit disen Worten: Vnser Herz Christus ist vnser seligmacher auff zwey-  
erley weis / Erstlich mit seinē verdienst am creuz / da er vns verzeihung  
der sünden vnd ewiges leben mit seinem todt verdienet hat. Zum andern /  
dieweil wir von natur so verderbet waren / daß wir solches von vns selbst  
nicht kondten glauben / sonder solche gnad durch vnglauben würdē auß-  
geschlagen haben / Gleich als wann man mir jekund ein arznei eynge-  
ben wolte / würdē ich dieselbe von mir schlagen / So hat Christus durch  
seinen geist den glauben in vnsern herzen gewircket / mit welchem wir  
seinen verdienst annemen / vñ also selig werden. Nach vollbrachter pres-  
dige



Digt als in der Oberampemā / Juncker Bernhard Conderk von Hells  
pen / sampt seinem sohn Abel / vnd auch darneben Dominus Lazarus  
Schoenerus Professor Mathematicus, vnd Ioannes Heupelius, ein  
Kirchendiener / besucht / hat er inen alle / einem nach dem andern / die hand  
gegeben / wie auch seinen collegis, hern Bernhardo vnd Altstedio, vnd  
hat einem jeglichen den segen Gottes gewünschet. Er hat auch als er nu <sup>Sorg für</sup>  
mehr kaum reden kondte / hern Altstedium vermanet / daß er zum Rath <sup>die armen.</sup>  
der statt gehn wolte / vnd die hern von sinet wegen vermanen / Daß sie  
forthin das allmosen nicht so tenuiter, das ist so spärlich vnd genaw / sons  
dern liberaliter, das ist freigeblich vnd reichlich auftheilen wolten / dann  
dieses sey der will Gottes / vnd auch vnser gnedigen Herrn. Ein wenig  
darnach / als im gemeldter Altstedijs ungefährlich mit disen worten zu  
sprache / Lieber bruder / Ir seyt on zweiffel ewerer seligkeit in Christo ge  
wis / gleich wie jr andere gelehret habt / Da antwortet er mit seiner schwa  
chē stimme / Certissimus, das ist / Ich bin meiner seligkeit ganz gewis /  
Vnd wise zugleich mit seiner hand auff sein hertz. Welches dann sein  
letstes wort gewesen. Dann bald darnach ist er in einen sanfftē schlaff <sup>Sanffter</sup>  
gefallen / welcher nit ein halbe viertelstund gewäret / vnd als wir merckten <sup>todt.</sup>  
daß er widerumb erwacht were / haben wir noch ein mal mit einander  
gebettet / vnd ist er vnder dem wir das Vatter vnser gesprochen / sanfftig  
lich im H E X X N verschiden. Den dritten tag hernach / nemlich den  
17 Martii ist sein leichnam nach Christlicher gewonheit ehrlich zur er  
den bestattet / vnd begraben worden in der Pfarrkirch zu Herborn / in wels  
cher er die drey letzten jar seines lebens auff diser welt / das wort Gottes  
sein vnd lauter vnd mit allen trewen geprediget hat.

APOCALYPS. XIII. VERS. XIII.

Beati mortui qui in Domino moriuntur.  
Selig seind die todten die im H E X X N sterben.



Faint, illegible text, likely bleed-through from the reverse side of the page.

Beati moysi qui in Domino moruere  
Georgius Martinus de ...





153633

AB: 153633


ULB Halle 3  
003 878 910




Sb.











Kurzer bericht  
Zum leben vnnnd sterben  
Herrn DOCTORIS GA.  
SPARIS OLEVIANI, Dieners  
des worts Gottes.

Gestellt durch IOHANNEM PISCATO-  
rem, Rectorem der Schule zu Herborn.

HEBR. XIII. v. VII.

Gedencket an ewre lehrer/ die euch das wort Gottes gesagt haben/wel-  
cher ende schawet an/vnd folget ihrem glauben nach.



Gedruckt zu Herborn in der Graffschafft Nassaw/  
Eckeneinbogen/ re. durch Christoff Raben.

M. D. LXXVII.